

Date – 30/12/2025

Time - 18:30 -18:40Hrs

AKASHVANI AIZAWL

HEADLINES (EVENING)

1. North-east Frontier Railway (NFR)-in kum thar January ni 1 atanga Guwahati leh Sairang inkara rel chhuah leh thlen hun tur tihdanglam tura a puan chu a sut leh.
2. Home Minister Pu K Sapdanga chuan Operation Jericho chu nakum March ni 31 thleng pawhsei tur a ni, a ti.
3. Esther Hnamte chu Ambani chenna in Mumbai-ah January ni 5-a zai turin thutlukna siam a ni.
4. Tiau chhum zing nasa in ramchhung hmar lamah thlawhna leh rel service a tibuai zui zel.

<><><>

TRAIN SCHEDULE

North-east Frontier Railway (NFR)-in kum thar January ni 1 atanga Guwahati leh Sairang inkara rel chhuah leh thlen hun tur tihdanglam tura a puan chu a sut leh.

Vawiina NFR chief public relations officer (CPRO) Pu Kapinjal Kishore Sharma-a'n Akashvani Aizawl news a hrilh danin Guwahati atanga Sairang pan tur rel chhuah hun tihdanglam tura thutlukna lo awm tawh leh Sairang atanga Guwahati pan tur rel chhuah hun tihdanglam tura tih tawh chu a ngai anga kal leh tura tih a ni. Tihdanglam tura an duan dan chuan Guwahati atanga Sairang pan tur rel hi zing dar 6-ah Guwahati chhuahsanin zan dar 7 leh a chanve a Sairang thleng tura tih a ni a. Chutiang bawkin Sairang rel chawlhmun atanga zing dar 6 a chhuakin zan dar 7 leh a chanve a Guwahati thleng tura ruahman a ni. He ruahmanna thar hi sut a nih leh tak avangin Guwahati atanga Sairang pana rel chhuak chu a hma ang bawkin tlai lam dar 7-ah Guwahati chhuahsanin a tuk zing lam dar 8 leh a chanve-ah Sairang a thleng tur a ni a. Sairang rel chawlhmun atang pawhin tlai lam dar 7 a chhuakin a tuk zing dar 8 leh a chanve-ah Guwahati a thleng dawn a ni.

Sairang leh Guwahati inkar rel tlan hun tihdanglam tura puan a nih khan sawiselna a nasa hle a. Social media-ah phei chuan duh lohna ri a ring hle a. NFR thuneitute hnenah pawh an thlen ni a hriat a ni. Hetiang rela zinmite tana khawlhkham zawnga rel chhuah leh thlen hun tihdanglam tum a ni hi sawiselna a nasat em avangin NFR thuneitute chuan a hun ngai anga tlan chhunzawm leh turin thutlukna an siam ta a ni.

<><><>

MPYCC

Mizoram Congress thalai pawl chuan ZPM leh MNF te chu Kristiante thlavang an hauh ngam tak tak a nih chuan BJP thlawpa NDA an thawhpuina hi inhnukdawk nghal turin an phut.

Mizoram Pradesh Youth Congress Committee (MPYCC) chuan vawiin khan thuchhuah siamin tun hnaiah India ramah Kristiante hunpui Krismas urlawk leh a lawmna hunah nasa takin dodalna leh beihna a thleng/hluar nasa hle a ni an ti a. Hei hi BJP thahrui Hindu Nationalist Organisation, Vishwa Hindu Parishad (VHP) thuchhuah avang leh India ram hmun hrang hranga Hindu firfiak pawl Bajrang Dal, Rashtriya Swayamsevak Sangh (RSS) a tel right-wing Hindu group-te hmalakna avang a ni a. Hetianga Kristiante nasa taka beih an ni hi Congress Thalai chuan pawl a ti tak zet a, a tulna apiangah Kristiante thlavang hauh turin hma a la zel dawn a ni, an ti bawk.

Kumin 2025 Krismas hi India rama Krismas hmangtu Kristiante tihbuai leh rikrap, Krismas lawmna carol te kutthlak, Krismas hmanna hmun leh a cheimawina suasam leh inkhawm tihbuai a hluar ber tum ni a sawiin, India ram chanchina kum 27 chhunga Krismas hmangtu Kristiante'n beih an tawh nasat ber kum a thleng hial a ni, an ti a. Nikum 2024 khan India rama Kristiante tihduhdahna hi vawi 800 chuang zet a thleng a, kumin 2025 chhungin Kristiante beihna tum 640 chuang zet thleng lehin nitin Kristiante'n tum hnih zel beih tawk ang a ni hial a. Hetianga Kristiante'n beih an tawhna hi BJP sorkarna State-ah a hluar zual vek bawk niin an sawi.

Hetianga Kristiante'n beih an tawh laia Mizoram sorkar Home Minister Pu K. Sapdanga'n thuchhuah a siam chu tlanche chung a siamah puhin Congress Thalai chuan dawihzephthlak an tih thu an sawi a. MNF Party thuchhuah siam pawh thil zahthlak takah Congress Thalai chuan a ngaih thu an sawi a. MNF leh ZPM te chu NDA thlawptu-ah puhin an thlawpna hi inhnukdawk nghal turin an ngen a. MP 2, Pu K. Vanlalvena leh Pu Richard Vanlalhmangaiha te pawhin na taka Central sorkar a tul anga nawr tur leh NDA an thlawpna pawh inhnukdawk turin Congress Thalai chuan a ngen bawk ni.

Congress Thalai chuan lungawi lohna lantir chu tih makmawhah an ngaih thu sawiin, Mizoram mipui leh pawl, Kohhran zawng zawng kan Kristian puite tana tangrual turin an ngenin an sawm a ni.

<><><>

OPERATION JERICHO

Home Minister Pu K Sapdanga chuan Operation Jericho chu nakum March ni 31 thleng pawhsei tur a ni, a ti.

He thu hi Akashvani Corr in a kawmnaah sawiin Pu K Sapdanga chuan Operation Jericho chu nakum March thla thleng pawhsei tura thuthlukna siam a ni tawh a ni a ti a. Operaation Jericho kalpui mekah ruihhlo ngai kawngpuia inchiu leh ke a kalna tura riak te chu Kohhranin camping an siam thu leh a duh duh lut thei turin programme an siam reng a. Kohhranin camping chhawng engemaw zat an siam thu leh a hlawhtling thawkhat a an hriat thu a sawi.

Khawlaiah ualau taka inchiu hmuh tur an la awm thu lehAizawl khawpui chu zanlai-ah a la ralmuang vaklo nia a lan thu a sawi a. Ni 24 zing khan Police leh Excise & Narcotics Dept tangkawpte’n khawlaia awm mai maiho, khawpui ti ralmuang lotute chu an khawm thu leh mi za vel an khawm thu a sawi a. Chu’ng an

khawmho chu Police motorin Camping centre ah dahluh an nih thu a sawi a. Heng an mi khawm zinga thenkhat chu an chhungten an hawn an ngen avanga phal taka thenkhat chu an mahni in a haw tir an nih thu a sawi. Chhungten an hawn loh mi 60 te chu TBCC ah dahluh an ni a ti.

Home Minister chuan Lawngtlai leh Siaha district a thuneitute leh tlawmngai pawlte chu ruihhlo kalkawng atana chim lam hman tum nia thudawn a nih avangin hma la tura hriattir an ni, a ti a. Manipur lam tanga ruihhlo rawn luhna kawng chu kawng tam a nih loh thu leh khan 2/3 bak a ni lo a. He tiang hi a nih avang hian police leh tlawmngai pawlte chu ngawrh leh zuala duty tura ruahmanna siam a nih thu leh Assam lam atang pawhin tlem a zawng chu rawn lut ve nia hriat a nih thu a sawi a. Assam leh Manipur bakah Tripura state atanga pawh a ruihhlo rawn luh theihna khan awm zawng zawng chu ngawrh leh zuala veng turin Police dah belh tura ruahman a nih thu a sawi bawh a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

ESTHER HNAME

India naupang chawimawina sang ber Pradhan Mantri Rashtriya Bal Puraskar chawimawina Mizoram atanga dawng hmasa ber Esther Lalduhawmi Hname chu Reliance Industries neitupa Pu Mukesh Dhirubhai Ambani in kum thar January ni 5 a a chenna Antilia, Mumbai-a mipa leh hmeichhe Cricket Team puala hun hmanna turah a zai dawn.

He thu hi vawiina Akashvani Corr in Pu David Lalzawmliana a kawmna-ah sawiin Esther Hname tia hriat lar chu Ambani Chenna In Antilia, Mumbai ah zai tur an sawmna chu nimin khan thuthlukna an siam thu a sawi a. India ram Magazine lar Femina pawhin an Magazine cover atana hman an duh chu February ni 12 atanga ni 15 chhunga thlalakna hun buatsaih tura tih a ni a. A thla an lak tur hi Mumbai a zai hun nen a remchan zawkna avangin thlalak hma pui tura Femina Magazine enkawltute nen an inbiak mek thu a sawi.

Esther Hname tia hriat lar a hming tak Esther Lalduhawmi Hname hi Ambani te chhungkaw chenna Antilia, Mumbai ah hian lawmman sem chhungin Kesari film hla ‘Teri Mitti’ sa tura beisei a ni.

Esther Hname hi vawiin khan Lunglei district bawrhsap Pi Navneet Mann chuan a hna thawh pindanah lawmpuina hlanin, thingpui a inpui a. Esther Hname-in Rashtriya Bal Puraskar 2025 a dawn lawmpuina leh chawimawina atan Lunglei Bawrhsap Pisa hian chawimawina thuziak (certificate of honour) bakah, lawmpuina pawisa fai cheng 10,000/- an hlan a. Bawrhsap Pi Navneet Mann chuan Esther Hname chu Lunglei leh Mizoram tihmingthatu a nih bakah, zai hmanga ram leh hnam inpumkhatna atana thawktu a nih thu sawiin, chhuanawm a tih thu a sawi a. Rashtriya Bal Puraskar chawimawina dawn pawh chu phu a tih thu leh a lawmpui

tak zet thu a sawi a. A zirna leh a zaina kawngah theih tawp chhuah zel tura chahin, duhsakna a hlan.

Esther Hnamte nu, Pi R. Lalawmpuii chuan a fanu-in Rashtriya Bal Puraskar chawimawina dawng thei tura Lunglei DC-in rawtna leh fak mawina (recommendation) tha tak an ziahsak avang te, award a dawn hnua an ngaihsak zui avang te'n lawm thu a sawi. Bawrhsap hian Lungleia kum 2026 Republic Day lawmna a zai turin Esther Hnamte hi an sawm nghal a. Rokhawlhna dang a awm loh chuan zai turin an inbe fel nghal a ni.

<><><>

CHEATING, EXTORTION CASE

Aizawl SP Pu Zosangliana chuan district police-te'n pawisa inchhuhsakna leh inbumna thubuai lian tak an chhuichhuah thu a sawi.

SP chuan tun thla ni 1 khat James Zoliana Kanhmun khawmi-in FIR a thehluh chu uluk taka chhui chian a nih thu a sawi a. He thu hi nimin a chanchinbumite a kawmna-ah sawiin Pu Zosangliana chuan thil thleng chungchang chu uluk tak leh fimkhur taka chhui niin James Zoliana'n a ziah dan chuan November ni 20 chhun dar 11 leh a chanve vel khan a hmelhriat Anthony-a chu ram leina tur pawisa kentirin an khaw pa Micky-a nen Falkland vengah an in hmu a. An pahnih hian World Bank Road, Trinity Hospital bul an thlen phei hma deuh in car pakhat Maruti Suzuki Fronx a mipa pakhat leh hmeichhe pahnih chuang te nen in hmu in, an in hmuh hnu lawk chuan Trinity Hospital lam atanga Bullet Bike lo phei chu an pia deuhah ding in he bike a chuang mipa pahnih Police Uniform hate chuan rawn panin an zawn lai an ni ti-in ni ti in an dap nghal a, he ta an pawisa ken, cheng nuai 17 sing 4 chu an chhuh lui anga tarlan a nih thu a sawi a.

Aizawl SP chuan thil thleng chungchang chu uluk tak leh fimkhur takin Kulikawn Police Station ASI Thangkima in a chhui zui-in Kulikawn Police Station ah FIR a thehlut a ni, a ti a. FIR-a a lan danin November ni 19 khan a tira FIR thehluttu James Zoliana leh a thurualpui hnamdang mi pahnih Abdula leh Debua tia a hriat te nen Damdawi (Methamphetamine) lei tur in Aizawl ah an rawn kal in Falkland venga hotel pakhatah thleng in methamphetamine lei dan tur leh inpek dan tur an rel ho ani, a ti a. November ni 20 vek khan Damdawi lei tur in Anthony-a chu an tir a. Methamphetamine lei tur a an indawr lai in Bike a rawn kal mi pahnih Police ni a rin (pakhat zawk chuan Jacket uk a ha) te chuan an mi zawn lai in ni ti in a kalpui pa Micky-a chu an zawn lai a nih thu an sawi a. Anthony-a erawh chu hawtirin a hnu ah car a rawn chuang mi 3 leh Micky-a leh Bike a rawn kal mi 2 an vaiin mi Paruk te chuan pawisa cheng nuai 17 sing 4 chu an in sem ta a ni, SP chuan a ti.

James Zoliana hian hnam dang mi pahnih te chu cheng sing 5 hlawhin a hrui thu sawiin James Zoliana hian thu dik lo Aizawl SP hnenah a thehlut avangin man a ni a ti. He thubuai a in hnamhnawih Aizawl mi 5 - Lalthlamuani Electric Veng, Lalmalsawmkimi Armed Veng South, Lalhmunmawia ITI Veng, Lalremruata Chaltlang leh Micky Lalmuanpuia Edentharr te chu man nghal an ni a.

He thil thleng chungchangah hian Bharatiya Nyaya Sanhita (BNS) section 308(2)/319(2)/240/61(2)/3(5) tlawhchhanin Kulikawn Police Station a thubuai ziahluh a ni a. Police-in an mante hi lemchan hmanga mi sum chhuhsak, pawisa

chhuih luih, thuneitu hnena dawt hrilh, phiarrukna leh intiam ruala pawikhawih a puh an ni.

<><><>

DENSE FOG HAVOC

Tiau chhum zingin ramchhung hmar lamah thlawhna leh rel service a tibuai zui zel a, Delhi Airport leh Delhi Railways Division-te sawi danin vawiin khan thlawhna 118 an thlawk chhuak thei lova, Delhi pan tur rel 20 chuang, darkar 3 chuangin an tlai phah bawk a ni.

Chhum zing hi la kiang mai dawn lova hriat anih avangin Civil Aviation Ministry chuan thlawhnaa zin turte chu an chuanna tur thlawhna dinhmun hre chiang hmasa turin a chah a ni.

<><><>

KHALEDA ZIA NO MORE

Bangladesh Prime Minister hlui, BNP Chairperson ni bawk, Khaleda Zia-i chu tukin khan Dhakha-a damdawi in-ah a thi a, kum 80-a upa a ni. A thih thu hi BNP Media Cell-in social media-a tarlangin Khaleda Zia chu private hospital pakhata hun engemawchen enkawl anih hnuah tukin khan a thi a ni.

Tum hnih Prime Minister ni tawh Khaleda Zia hi Bangladesh politician hlun a ni a, kum tam tak chhung BNP chairperson a ni tawh bawk a ni.

Prime Minister Narendra Modi-a chuan Khaleda Zia thi chu pawl a tih thu sawiin Bangladesh hmasawna tura a hnathawhte India leh Bangladesh inkar siamtha tura a hmalakna zawng zawngte hriat reng a ni tawh ang, a ti.

<><><>